

# L'AYGAT DE SENT-SUBRA

**Al proufit des paoures inoundats.**

..... et aquae prævaluerunt nimis super  
terram.

GEN. ch. VII, v. 19.

Couci s'es abalit, le paoure Sent-Subra!  
Qui la bist? Qui le bey! Qui may le rebeyra?  
Soun sol debousigat, sous oustals en ruino  
An escryout en tout loc la bengenço dibino.  
En entendren counta tant de malhurs cruëls,  
Qui dounc estourriyo lay gourgoy de sous èls?  
L'aourelho n'a tindat; le ritche damel paoure  
De plours coumo d'escuts sur Toulouse an fayt plaoure;  
Paris al prumiè reng. Brabe Paris, merci!  
Pos crese qu'ay de cors et de brasses ayci.....  
Le joun èro bengut oun le cèl en coulèro  
Budabo sa furou dins le ryau, dins l'ayèro;  
Calho per netteja li bicis, li defaous,  
Qu'un deluge noubèl ragéssø sur nousaous.  
Despèy trey lounghi jouns, le tens, coulou de sèjo,  
Encantabo pr'ayci lay dournoy de la plèjo;



La bélho de Sent-Jean, oun le pople jouyous  
Saoutabo al patchitchi sur tant de fougayrous,  
Toulouso se begèt, del Poun à Patto-d'Aouco,  
Pleno d'aygo e de bart, coumo'no grando naouco ;  
Tout Sent-Subra mamèt... L'aygat, coumo'n lansol,  
Sur el e souy besis esplandissio le dol ;  
L'antique Chay-Redoun, jouts le cèl que l'azaygo,  
Se trobo lèou claoufit de milo tinoy d'aygo.  
Loutens crejèbon pas à la grandou del flèou :  
Cadun per descapa cresio qu'èro trop lèou.  
Mèy benghèt un moumen que dins cado carièro  
Fasquèt un passo-lis, fasquèt uno payssièro.  
Labets al soun del cor le desespouèr amar  
Demando se le cèl y descampo la mar ;  
Le crestia prègo Dyous, le malcresen renègo ;  
Les homi, li chabals, tout s'afounso, se nègo ;  
L'aygo'pleno la cabo e ne fa qu'un pesquièr,  
Tutejo la boutigo, e mounto l'escalhè ;  
La familho à l'un cop surpreso, desoulado,  
Grimpo pel galata, surcargo la teoulado.....  
Tout carrinco, s'acato, e li murs delougats  
Fan un barrejadis de cambos et de cats.  
Quand debalo la nèyt... Jamay de nèyt ta soumbro  
Per espaouri li byous li neghèt de tant d'ombro !  
Le cluquiè brounzinabo, e la campano'n plours  
Cridabo sans repaous : Al secours ! al secours !  
Le secours arribèt, e cadun per l'escalo  
Dins le loung garrabot, palle de poou debalo.  
Toulouso bouy remercio, ô souy brabi soulzats!!!  
Mèy planis per digus poudion èstre salbats.....  
La plu courto de l'an, aquelo nèyt tout belho ;  
Que pareys loungo !... Re nou cluco la perpelho,  
L'aygo mounto toutchoun, toutchoun plaou, toutchoun plaou ;  
L'aygo ben su l'aouta dedins Sent-Nicoulaou !

L'esparbiè de la Mort fa la pesco... Le barri  
Bey le carme sacrat degruna le rousari;  
Deforo prègo Dyous à genous sul balcoun,  
A sa pregario tout espèro, tout respoun.  
L'albo puntejo anfin, sinistro... Anaquel' houro  
Entenden le païs que hurlo lèn e plouro.....  
Tout toumbo de pertout. L'éclo de Sent-Subra  
Es tout echalatat, e pot pay may boula;  
De pléjo tout ragen, adalit, mougne, treoule,  
Aros à cabarlous se trincho sur un teoule,  
Aro grupit de fret, tout trempe de la nèyt,  
Sur un poutre querat dins l'aygo fa soun lièyt;  
Aro d'un albre bièl agafat à la branco  
Batsaco sul couren que mino et le derranco;  
D'aquistan aperceou, toutis anfles e blus,  
Entraynats dins li flots, d'homes que jamay plus!  
L'aygo mêmô a gaousat, Rapas, tantos e mayssos,  
Sans respèc pe la Mort, desenterra tas cayssos,  
Coumo per dire ay byous lour quart-d'houro fatal,  
Lay menabo truca le tustet de l'oustal.  
Mès escoutats ayços. Iou sabi pas ount èro,  
Du bessous droumission dedins uno pastièro.....  
Quand l'aygo ben aquyou may grando que jamay.....  
La mayre dami fils se bouto dins la may.  
Traynадis pel couren trabucon countro'n albre;  
La fенно s'y m'arrapo, e frets coumo de malbre,  
Sur un laougè branquet se quilhon toutis tres.  
Mèy la cambo de l'albre y feplo per tal pes.....  
La mayre pren souy fils, à l'albre les estaco,  
E mentre que la branco encaro à fèt nou craco,  
La paouro un dargnè cop fa plaoure su bessous  
Un delabassi caout de larmos e poutous;  
E per salba souy fils, sans crese fa de faouto,  
Dam'un sinne de crouts dins la Garono saouto.....

Per un remoulinet la paouro dispareys....  
Le cèl èro counten : despèy l'aygo decreys.  
O jantis bessounets, lebats cado manetto,  
Quand bouy destacaran de sur bostro branquette,  
Ah! plourats bostro mayre, e pregats le boun Dyous :  
Per elo sèts nascuts, e per elo sèts byous....  
Oy!!!! que besi de lèn?... Dins le soumbre desastre,  
Que bransolo su l'aygo, et lusis coumo'n astre?  
Un pitchou dins soun brès!... Les angelous poullits  
Ramon des alirous penden que drom e rits ;  
La Garono altour d'el s'apayse et le trandolo  
Aouta besiadomen que fa la bressayrolo.  
Dyous fa sinnes... Le cèl que l'a salbat tout soul,  
Porto dins un castèl nostre pitchou boudoul.  
Quand Moïso del Nil sur sa desco se salbo,  
Soun pople del salut a bist punteja l'albo.

G. BERNÉS.

Toulouse, le 2 août 1875.

Toulouse, imprimerie Édouard PRIVAT, rue Tripière, 9. — 305

